



UNIVERSITÄTS-
BIBLIOTHEK
PADERBORN

Ethica Symbolica E Fabularum Umbris In Veritatis Lucem Varia Ervditione Noviter evoluta

Pexenfelder, Michael

Monachii, 1675

4. Suspicio parens irarum.

[urn:nbn:de:hbz:466:1-68709](https://nbn-resolving.org/urn:nbn:de:hbz:466:1-68709)

bus efflare spiritum seu halitum; hinc adagium: *fumantem urfi nasum ne tentaveris.*

Neque verò iræ tantum impetus sunt ad rationis moderamen flectendi, sed cæterarum quoque affectionum humanarum, præsertim cupiditatis, voluptatis, timoris commotiones opus habent Æolo prudenti, qui non sinat eas temerè velut discordes in prælia ventos procurrare, sed regat, domet, & premat habenis.

III. (c) Notandum est, quod Maro loc. cit. Æneid. Junonem inducat blandissima verba dantem Æolo, quibus eum ad tempestatem in mari adversus Trojanos concitandam adhortatur. Hoc scilicet faciunt Junones istæ, superbæ, iracundæ; quibus satis non est solis miscere cælum terræ, ipsùmque Acheronta movere, nisi viros etiam in partem suarum libidinum rapiant. Alexander Macedo ut Persepolin, nobilissimam Persidis urbem incenderet, Thais ei temulenta facem prætulit. Curt. lib. 5. *Celsa sedebat Æolus arce, sceptrum tenent;* quis hunc regem de sua quiete movit; & eum turbavit, qui turbas ventorum sceptrum suo domat; quis incitavit ad tempestatem in alieno regno, nempe Neptuni, exuscitandam? Juno fuit, femineâ fallaciâ blandiens. O quoties fit, ut Ratio, quam in capite, tanquam in Arce posuit Deus, per illecebras mulierum, aut pravarum libidinum, in gravissimas perturbationes, & regnorum ac provinciarum pestes rapiatur? Et quid mollius, ac effeminatius, quam illud Æoli:

----- tuus ô regina, quid optes

Explorare labor, mihi iussa capessere fas est.

Hoc dicunt, aguntque, qui femineis imperiis ac blandimentis aguntur. Cui non est lecta historia de Nino Assyriorum Rege, qui cum vel unum in diem uxori Semiramidi imperium permisisset, miser conjugis mandato in vincula coniectus, & imperio ac vita exutus est? Ælian. lib. 7. c. 1. Dio.

IV. (d) Subtiliùs fortassè per Junonem intelligas *Suspicionem* seu *Imaginationem* injuriæ, quâ homo correptus, inflatur velut Æolus, & turbulentos in omnem partem ventos, hoc est, furoris impetus spargit. Et enim Seneca teste, levissimis ex suspicionibus gravissimæ concitationes oriuntur. Et quid ingerit futilis hæc Juno. *Suspicio* inquam?

Incute vim ventis, submersasque obrue puppes.

Exere vires, & ostende, quid possit læsa patientia? quid injuria honori & famæ illata? quid utriusque defensio? Hic verò feroces surgunt

I i i 3

spiritus,

(c) *Feminarum imperium.* (d) *Suspicio causa iracundia.*

Spiritus, ultionis stimulat cupido, irarum flamina non fecus ac Eurus, Notusque ruunt, & vastos voluunt ad littora fluctus. Grandis oritur tempestas, eripitur dies menti, obfuscatur ratio, recto iudicio nox incubat atra, omnes animi facultates procellis involvuntur. Monet Horatius lib. I. epist. ad Lolium:

Ira furor brevis est: animum rege; qui nisi pareat,

Imperat: hunc frenis, hunc tu compesce catena.

V. (e) Boream immodicè vires suas jactantem suprâ audivimus: quò denotatur, multa quidem per vim & terrorem obtineri; sed tamen verissimum illud esse Sallustii dictum: *Savitia plus timoris, quam potentie addit.* Imperia crudelia magis acerba sunt, quàm diuturna. Sapissimè fit, ut furorem suum effundat in scopulum Aquilo, & ibi frangatur maximè, ubi maximè debacchatur. Non rarò plus potuit leni flamine Zephyrus, quàm vesano murmure Ventus ille rapidus. Hoc veteri apologo docemur. Fortè Zephyrus & Boreas certamen inter se inibant, utrius majores essent vires. Placuit experimentum in viatore sumere, quem, qui prior vestibus spoliasset, næ is prævaleret robore. Institit initium facere Boreas, meras efflare hiemes, horrendum furere, & omni flatuum conatu id agere, ut viatoris capiti pileum, aut lateri pallium deriperet. Frustra fuit impetus. Hoc enim ut agi viator sensit, rei sue fatagens obniti cœpit pro viribus: pileum, ne volaret, strictius sibi imprimere: pallium, ne viventi abriperetur, brachiis subjicere, illòque se involuere. Ea in adversum contentione fractus Boreas, animum despondit, alas demisit. Zephyrus alium instituens vincendi modum, orsus est quàm mollissimè spirare, tepidulam afflare auram, dulci blandiri sibilo, placido mulcere ventulo caput & ora viatoris, lenissimè per ipsas subire vestes, totumque hominis corpus leniter demulcere. Calebat, jam antè Solis & itineris æstu viator, arebant fauces, languebant humeri, succidebant pedes, sudor per artus fluebat; ipsèque jam sibi grande pondus fuerat, nedum vestis. Ergo ventilatur strophio vertex, pileus ponitur, solvitur sinus, rejicitur penula; jamque umbraculum prospicit, seque subter opacam arborem sternit humi, ut seminudus exciperet blandi flabra Favonii. Ita victoria cessit Zephyro. Mansuetudo lenè tormentum adhibet animo; tunc vincit maximè, cum cedere videtur & vinci. Herba, cui nomen ocymus, modicè compressa reddit odorem; durius attrita, amittit suavitatem.

VI. (f)

(e) Major est vis in moderatione, quàm in impetu.